

De Palm Island a celebra su 20 aña cu

Hopí invitado, hopí recuerdo agradable y un futuro cu hopí planes



ORANJESTAD – E storia di De Palm Island ta bon conoci caba, pasobra ta for di tempo cu Refeneria Lago a sera su portanan na 1985 cu De Palm Holdings a conclui cu turismo lo reemplasa refinamento di petroleo, como un entrada di intercambio stranhero y lo bira e pilar mas importante di economia di Aruba. De Palm Tours a decubri e tempo ey tambe cu tur hende tabata enfoca riba construccion di hotel pa e industria di turismo, pero ningun hende tabata pensa riba e facilidadnan recreacional y actividadnan pa e bishitantenan hasi durante nan estadia na Aruba. E compania e ora ey a dicidi di combina su servicio di transport, cu un desaroyo agresivo cu facilidadnan recreacional y servicionan acuatico. Asina e inversion pa desaroya De Palm Island a ser hustifica. Miyones di Dollar a ser inverti den e isla priva aki, cu a habri

na Januari 1988.

Durante e recepcion bon atendi recientemente, Presidente di De Palm Corporation, esta Sr. Harold Malmberg hunto cu su dos yiunan Ricky y Lisette a repasa e 20 añanan di exito di De Palm Island cu ya a transcuri.

El a enfatiza specialmente riba e meta di 20 aña pasa y con poco-poco a bai ta cristalisando cada un di e ideanan, di acuerdo cu e mercado, cu e timing perfecto y teniendo na cuenta cu e demanda local y internacional. Rob Smith den representacion di AHATA tambe a hiba un discurso enfocando riba e importancia pa tin mas forma di entretenimento posibel pa e turistanan.

Minister Eddie Briesen tabatin palabranan di aprecio y di gratitud pa famia Malmberg, pasobra EDe Palm



Island ta simplemente un di e exitonan di e famia aki cu pa hopi aña caba ta enfocando riba turismo di nos pais.

Separa di e discursonan elocuente durante e anochi aki, tambe a anuncia cu for di December 2007 caba e compania Taste of Belgium ta encarga cu tur loke ta “catering” riba e isla. Den forma simbolico gerencia di De Palm Tours a entrega e grupo aki algun forki grandi pa confirma nan alianza.

Na mes momento, cu masha placer a honra Sra. Dorothy Phillips, kende a fungi como secretaria di Sr. Harold Malmberg durante e ultimo 30 añanan aki. E ta un berdadero ehempel di lealtad y disciplina den e compania. A probecha e momento di e celebracion di 20 aña di existencia di De Palm Island pa honre tambe.

